

Ale üritus peigmeheseisust taastada

Ale-õks-jal-kõist velekeist,
kallist imekanakõist!
Läts õks jal kulla tuuhtõ kodo,
4725 meelimari tuuhtõ majja,
koh oll´ õks tä suvõ sulasõh,
pardsi, palka võtmah.
Läts õks tä tarrõ tasatsõhõ,
astõ sinnä alatohe.
4730 Tälle õks kõik naardõh vasta ütli^q,
kutsi^q kull´a kosilatsõst:
“Kas tullit õks jo saaja kutsmahe,
tuvi, truuskat otsmahe?”
Ale ütles õks mitte midäge,
4735 kosta-s kolmõ sõnna.
Nimä^q õks jal lausi^q meelestäni,
meelest, meele poolõstani:
“Kae õks no, kae, näe, näe,
kae õks mi Ale kaala pääle,
4740 heidä silme hellä pääle -
mille olõt õks sa kurvah, kosilanõ,
olõt noroh, nuur miis?
Tuu om õks vaest pereh sinno petnõ,
Taadsi tagase käändnõ?”
4745 Ale näile õks sis üteli^q umma ohto,
umma kaiho kaibõlli:
“Mino jäävä^q õks jo joogi^q jutusõst,
kos´a^q kolgalõ kõnõlda -
sinnä õks jo läts kavval Kaadsi,
4750 kavval Kaadsi, vikur vell´o!”
Ale-õks-sis-kõist velekeist,
kallist imekanakõist -
Ale õks sis kutsi ne kumard´,
Ale pallõl´, painutõlli:
4755 “Kuulõ^q õks no, peenü peremiis,
os´a hüä or´a-ese,
lääme õks vil sinnä üte voori,
kallumõ kaemahe!
Uma lüüt õks sa keero keskehe,
4760 märksa margo vaihõllõ,
agu nakas õks su kiird kihennemä,
jutt juundõ minemähe?”
Sis panni^q õks nää^q ette hüä hobõsõ,
panni^q virga vehmrehe.
4765 Nimä^q aiva^q õks vil süümä armast Alet,
lavva taadõ lainalist.
Alel lää-s õks joht süük süämehe,

vao-s juuk varbehe,
muudku tundsõ õks täl süä Tuula tütärd,
4770 meeli tahtsõ Taadsikõist.
Muudku lätsi^q õks nää^q rutto minemähe,
virgastõ veerümähe.
Sinnä lätsi^q õks nää^q ilda õdagol,
pilgõ^q sinnä pümehel.
4775 Ale läts õks jo tarrõ tasatsõhõ,
astõ sisse alatohe.
Peremiis õks küll läts kärmähe,
tougas´ sisse torõhõhõ.
Esi õks tä teret´ ne tõrõle,
4780 and´ kätt ne kärisi:
“Mille piä-s õks ti meeleh mu sõnna,
umadsõ oppuist,
mille teit õks ti Alet alatost,
mi kos´a^q kurvalitset?
4785 Kuulõ^q õks sa, noori näiokõnõ,
rõõsa piimä koorõkõnõ!
Kui sa õks taha-i meele tulla^q,
taha-i Alelõ asto^q,
küll haarat õks vil vaja halusahe,
4790 tunnõt vaja tulusahe!
Lasõ õks sa lääde, sis sa näede,
las kallut, sis kaedõ:
sääl om õks hot´ korgõ rüäkuhi,
om rassõ rahakott,
4795 raha saasõ õks ehk karpe katõst kuust,
kuhja kolmõst nädalist!”
Näio õks imp kullõ-s timä jutto,
kullõ-s suu sunnituist,
Taadsi taha-s õks imp Alega kõnõlda,
4800 jutto aia^q armaga.
Üte üteli^q õks jo sõna ütsä seest,
kallut´ katsa vaihõlt,
nuu^qke üteli^q õks tä sõna^q huultõ otsast,
keele otsast keerätelli.
4805 Sis õks nää^q massi^q kos´araha,
vell´olõ viinaraha.
Õga õks imp Ale süümä istu-s,
süä lasku-s lavva taadõ,
muudku sei õks sääl suur sugulanõ,
4810 kulla kos´a tuujani.
Õga- läts õks ar -üts umma paika,
kulla umma kotusõhõ.